

浙江圖書館叢書 第一集

新刊國朝詩林卷一

浙江圖書館叢書第一集

晉書四夷傳地

經攷證

中華民國四年浙
江圖書館校刊

晉書四夷傳地理攷證

仁和丁謙益甫氏學

夫恢恢乾德萬類之所資始蕩蕩坤儀九區之所均載攷羲軒
於往統肇承天而理物訊炎昊於前辟爰制地而疏疆襲冠帶
以辨諸華限要荒以殊遐裔區分中外其來尚矣九夷八狄被
青野而亘玄方七戎六蠻縣西宇而橫南極繁種落異君長遇
有道則時遵聲教鍾無妄則爭肆虔劉趨扇風塵蓋其性也詳
求遐議歷選深謨莫不待以羈縻防其猾夏武帝受終衰魏廓
境全異威略既申招攜斯廣迷亂華之議矜來遠之名撫舊懷
新歲時無怠凡四夷入貢者有二十三國既而惠皇失德中宗
播遷凶徒分據天邑傾淪朝化所覃江外而已琛貢之禮於茲

殆絕殊風異俗所未能詳故探其可知者爲之傳云北狄竊號中壤備於載記其在諸部種類今略書之

夫餘國在元菟北千餘里南接鮮卑北有弱水地方二千里戶八萬有城邑宮室地宜五穀其人強勇會同揖讓之儀有似中國自先世以來未嘗被破國中有穢城本穢貊之城也武帝時來朝貢至太康六年爲慕容廆所襲其王自殺子弟走保沃沮未幾護東夷校尉何龕遣督郵賈沈與廆戰大敗之始得復國夫餘見後漢書及魏志國跨松花江盡有吉林西北境今農安縣其都城也云元菟北千里正合鮮卑慕容氏居遼水西當云西南與接弱水攷見後漢書穢貊二國在朝鮮東境此不過因穢人僑居因名其城國破子弟保沃沮知當時北沃

沮爲所役屬故可暫保惟復國後至晉末義熙六年爲高麗

所滅

見好大王碑

馬韓韓有三種一曰馬韓二曰辰韓三曰弁韓三

原誤辰

韓在帶

方南東西以海爲限馬韓居山海之間無城郭凡有小國五十
六大者萬戶小者數千家太康元年入貢後頻至咸寧閒請內
附

三韓均見後漢書三國志帶方郡漢末公孫康所增設爲朝
鮮京畿道北地故三韓均在其南馬韓今之全羅道所都金
馬城卽益山郡也

辰韓在馬韓之東自言秦人避役入韓韓割東界以居之立城
柵以居言語類秦人謂之秦韓初有六國後稍分爲十二又有

四夷傳列傳
弁韓亦十二國合四五萬戶皆屬於辰韓辰韓常用馬韓人作主不得自立明其爲流移之人故爲馬韓所制也太康時三來朝貢

辰韓在馬韓東今慶尙道北部地所都卽慶州也弁韓在辰韓南今慶尙道南部東萊釜山等地

肅慎氏一名挹婁在不咸山北去扶餘可六十日行東濱大海西接寇漫汗北極弱水廣袤數千里居深山窮谷車馬不通武帝元帝時俱來貢獻

挹婁見後漢書及三國志魏志言在扶餘東北千里南與北沃沮接不咸山卽長白山惟旣在山北又與北沃沮接則當云扶餘東南非東北矣寇漫汗卽後寇莫汗北史作豆莫婁

攷此部爲北扶餘舊壤在今烏蘇里江一帶詳魏書攷證至
云肅慎一名挹婁非是按肅慎爲虞夏以來著名之國挹婁
稱號始見於後漢書言國無君長邑落各有大人是挹婁者
不過肅慎境中一部族並不足以名國第因生齒繁衍分布
各方而肅慎主權日就衰替不足以制馭之其人遂據地自
擅互相雄長於是肅慎一國竟在若存若亡之閒以余攷之
其國三晉實未嘗亡也挹婁本水名卽唐書渤海傳奧婁河
今爲敦化縣境渤海立國以故挹婁地立定理安邊等府均
在敦化以西至奉天之東南肅慎王城在寧古塔南以挹婁
梗於中閒致肅慎與中國之交通遂阻故當時史籍但知有
挹婁不知有肅慎因以爲挹婁古肅慎也而此更謂肅慎一

名挹婁則誤尤甚矣。至晉時肅慎云未亡者。史雖不載。實有確證存焉。據鴨綠江北出土高麗好大王碑言。其踐阼之八年戊戌。偏師出肅慎。掠得某城地。人民云云。戊戌爲東晉安帝隆安二年。是晉之末造。國尙安然無恙。迨後高麗益強。肅慎挹婁始俱爲所併。觀隋煬帝征高麗分二十四軍。其右翼有肅慎道。知其時地入高麗已久。但不悉亡於何年。高麗史志中當有載者。

倭人在帶方東南大海中。依山島爲國。地多山林。無良田。食海物。舊有百餘小國相接。至魏時有三十六國。戶七萬。男子悉文身黥面。自謂太伯之後。漢末國亂。乃立女子爲王。名曰卑彌呼。宣帝平公孫氏女王。遣使至帶方朝見。其後貢聘不絕。

倭人亦見後漢書三國志攷日本國志景行天皇時親征叛臣於美濃命皇子征鯨夷又遣使巡察東北諸國知漢時日本尚有各國分據景行孫仲哀天皇出征卒於軍其妻神功皇后嗣其位凡七十年起於建安六年至晉武初尚存活也

晉武帝太始元年卽神功皇后六十六年

裨離國在肅慎西北馬行可二百日領戶二萬養雲國去裨離馬行又五十日領戶二萬寇莫汗國去養雲國又百日領戶五萬餘一羣國去寇莫汗又百五十日計去肅慎五萬餘里其風俗土壤並未詳泰始三年各獻方物至太熙初復有牟奴國模盧國末利國蒲都國繩余國沙樓國各遣使詣東夷校尉何龕歸化

此十國除寇莫汗卽北魏書之豆莫婁外其他均無可攷但大約總在黑龍江及俄屬阿模爾等省地所云馬行百日二百日及去肅慎五萬餘里殊不足信蓋由東三省至北冰海不過萬餘里馬行亦不過百日安得如傳所言耶

吐谷渾慕容廆之庶長兄也其父涉歸分部落千七百家以隸之及廆嗣位二部馬鬪廆怒曰先公分建有別何不遠離而令鬪吐谷渾曰馬鬪其性何怒於人乖別甚易當去汝於萬里外矣遂行廆悔遣長史史那樓馮等追還之渾曰先世卜筮之言當有二子克昌祚流後裔我是卑庶理無兩大今因馬而別殆天所啟諸君試驅馬令東馬若還東我當隨去樓馮遣從者擁馬令東行數百步卽悲哀西走如是者十數皆曰此非人事

遂止渾謂部落曰我兄弟俱當享國然庖及曾元可百餘年我
元孫以後其始昌乎於是走附陰山永嘉時乃度隴而西後子
孫據有西零甘松極乎白蘭數千里有城郭而不居逐水草居
廬帳以肉酪爲糧吐谷渾年七十二卒子六十人長吐延嗣吐
延雄姿魁傑倏儻不羣然自負其智不能恤下爲羌酋姜聰刺
死子葉延嗣葉延性至孝年十歲父被刺每旦束草爲讎而射
之母病五日不食葉延亦不食長沈毅好問涉獵書傳自謂公
孫之子得以王父字爲氏吾祖始自昌黎光宅於此今以吐谷
渾爲氏尊祖也卒子辟奚嗣辟奚性慈厚三弟皆專恣長史鍾
惡地恐爲國害不請命逕誅之辟奚素友愛因成疾遂令世子
視連攝位年餘卒視連幼廉慎有志性以父憂卒不飲酒田獵

者七年卒。子視罷嗣。視罷英果有雄略。虛懷撫納。衆赴如歸。乞伏乾歸遣使拜白蘭王。視罷不受。卒子幼。傳值於弟烏紇堤。烏紇堤耽酒色。不卹國事。與乞伏乾歸戰大敗。走南涼死。視罷子樹洛干立。樹洛干既立。率所部歸莫何川。自稱大單于。化行所部。衆庶樂業。沙湫雜種莫不歸附。乞伏乾歸忌之。率二萬騎攻之於赤水。樹洛干敗降。乾歸拜爲平狄將軍。後又爲乞伏熾盤所破。慚忿而卒。子拾虔嗣。

吐谷渾所部卽今青海等地。陰山在河套北。吳刺特旗境。西零卽先零。後漢書先零居榆中地。在今西寧循化廳境。見水經注。白蘭在青海南。今柴達木地。莫何川在青海東南。今稱謨和爾布拉克。赤水在其東。卽烏蘭布拉克。

焉耆國西去洛陽八千二百里南至尉犁北與烏孫接地方四百里四面有大山道險隘百人守之千人不遇太康中王龍安遣子入侍安將卒謂世子會曰我嘗辱於龜茲汝能雪之乃吾子也及會立襲滅龜茲而據其國遣子熙歸王本邦會有膽氣籌略遂霸西胡葱嶺以東莫不率服然恃勇輕卒卒爲龜茲人羅雲所殺後張駿遣沙州刺史楊宣經理西域部將張植敗熙於賁崙城進屯鐵門熙又率衆要之於遮留谷植知有伏先單騎嘗之伏果發植馳擊敗之進據尉犁熙遂降未幾呂光討西域復降於光

焉耆見前後漢書爲今喀喇沙爾城地尉犁在博斯騰泊西南下開都河東岸烏孫在伊犁南特克斯河濱賁崙城未詳

鐵門卽水經注鐵谷關。今喀喇沙爾西南百餘里有兩山對峙成峽。凡三十里。河經其中。其北口有大石嶺卽鐵門。其南口卽遮留谷也。進據尉犁。此尉犁乃渠犁之誤。蓋出遮留谷西爲今庫勒爾城。庫勒爾卽漢渠犁。若尉犁尙在東南。非孔道所當經。故知其誤。○按晉書凡言西去某地。其意謂在某地之西。而語似倒置。

龜茲國西去洛陽八千二百八十里。有城郭。其城三重。中有佛塔廟千所。人以田種畜牧爲業。太康中遣子入侍。惠懷末中國亂。乃貢於張重華。苻堅時其將呂光率衆討平之。

龜茲見前後漢書卽庫車城地。

大宛西去洛陽萬三千三百五十里。南至大月氏。北接康居。大

小七十餘城多善馬馬汗血人皆深目多鬚太康六年遣使拜其酋爲王王卒子立遣貢汗血馬

大宛見兩漢書卽故浩罕部地今爲俄屬費爾干省大月氏在其西南今布哈爾國也

康居國在大宛西北可二千里與粟弋伊列鄰其王居蘇薤城地和暖饒桐柳蒲萄多牛羊出好馬泰始中貢獻

康居見漢書在錫爾河及鹹海北境粟弋西史作西地晉時居俄南近黑海諸地伊列卽伊犁轉音蓋漢晉時伊犁河南爲烏孫國河北別有伊列國近時攷據家多謂烏孫在伊犁殊誤漢書甘延壽傳言郅支單于侵陵烏孫大宛如得二國北擊伊列可見伊列不在烏孫境內漢時康居國都爲卑闐